

Xanana Rende Harii Planta LNG iha Beasu, Possibilidade Muda ba Natarbora

By Tempo Timor · December 05, 2019



Plantasaun Beasu

Grafis husi google.com

Tempotimor (Dili)-Xefe Negosiadór ba Delimitasaun Fronteira Maritima (XNDFM), Kay Rala Xanana Gusmão rende hodi halo negosiasaun ho comunidade sira iha Beasu, Postu Administrativu Uatulari, Munisipiu Vikeke, relaciona ho planu atu estabelese planta Liquefied Natural Gas (LNG).

Tuir planu governu nian, Beasu, Munisipiu Vikeke, sei sai nu'udar fatin ida atu estabelese LNG, maibé planu ne'e ameasadu la realiza iha fatin refere, tanba indinimizaun ne'ebé comunidade Beasu husu boot liu.

Deputadu husi bankada FRETILIN Fabião de Oliveira informa katak, Xefe Negosiadór halo ona negosiasaun ho comunidade sira iha Beasu, maibé comunidade nia proposta ba indinimizaun boot liu.

Tuir informasaun ne'ebé deputadu ne'e simu, tanba laiha konkordansia ba malu, Xanana deside hodi muda fali planta LNG ba Natarbora, Munisipiu Manatuto.

"Ha'u mós rona katak (planta LNG) la akontese iha Beasu maibé muda fali ba Natarbora, entaun se la akontese iha Beasu signifika dezentendimentu entre Xefe Negosiadór ho ita-nia populasaun sira kona-ba indinimizaun," informa deputadu Fabião iha Parlamentu Nasionál (PN), Kinta (05/12/19).

Tuir nia, mosu dezintendimentu tanba governu hakarak muda comunidade sira ba foho leten ne'ebé bee laiha.

"Fatin ne'ebé atu muda fali populasaun (ba) ne'e susar, tanba bee laiha, tanba antes ne'e populasaun hela iha parte kraik (rai tetuk) maibé muda fali ba leten (foho) ne'e susar, tanba ne'e mosu dezintendimentu."

Kona-ba atu muda fali ba Natarbora, deputadu ne'e dehan, ne'e depende ba prosesu negosiasaun Xefe Negosiadór ho populasaun Natarbora.

Maibé, iha preokupasaun kona-ba rai iha Natarbora, tanba rai ne'e potencia ba agrikultura no pekuaria.

"Se estabelese planta LNG iha Natarbora sei estraga poténsia agrikultura nian husi parte tasi mane," dehan Fabião.

Entretantu, tuir informasaun ne'ebé Tempotimor.com asesu, Xefe Negosiadór Xanana Gusmão iha 7 Dezembru 2019 sei hahú negosiasaun ho comunidade sira iha Natarbora.